

1 Timoti

Vu'a Anejijihina

¹ Na Poru Jesu Keriso oni apasorua 'ee Godi ka'ene núni Ni'ajúhi'ina 'ee Jesu Keriso ka'ene núra nimaa rojujara 'warivume rejuta. ² Timoti a nimaa ronujihuna'e a nuni hariha renana. 'Ena'omo Godi Amo'o Jesu Keriso ka'ene núni Natohwiji'o a maiji vwhanae 'ee numirame 'ee matauv'iiniji 'waramare'e veju.

Siseisei Najahi'inijihi Puni Jujuvu'ijina

³ Na Masatoniai va'irono a Epasasi hi'amarono 'ejahae 'waravu jihuni maijaho ea ka'ene vu'a ani'ina vajahuji tanu'urihe arehuna'e 'waravuta. ⁴ 'Enakúne 'waravakame mamiha sisea 'ee amuja nirisaravujaho areva. Ijihuni maijaho ijipo veju'e nakaravi'i hijura. 'Ene ijipo venau'e Godoni kaukara ka'ene nimaaroijaho pani'ajahu'e emarenuna. ⁵ Nara vu'a ka'ene najahu jihuni maijaho oja 'unama mamaijino 'ekarame 'ee hamu vwhane 'ee hamu nimaa ro'vara. ⁶ Pu ea 'aho'a 'unama ikehunakija are'ika'i vu'a ka'ene maa pa'ajihija'e 'wamojura. ⁷ Pu tamana najahuri tisa ura renau kaivo pu pahena pakavi'ina kaivo vu pura 'wara'avajaho niho'o he paraji'napo 'waravu ja'ina rehuna. ⁸ Nú nihena kavu. Ea irara Tamana kaji hene venujaho tamana kajaho mamaa. ⁹ Nú ja pu'úmo nihena kavu. Tamanijaho nimaa'e ea ka'ene ariri jihipuna'e vehuna pana. 'Enakaivo ea ka'ene

varapa tuvi'ina ka'ene vuataa paheji'ina 'ee Godi paheji'ina 'ee sisea veji'ina 'ee paakuavi'i majikari hiji'ina 'ee 'unama aririjihij 'ijahij'ina 'ee opwaha 'ee ohwaha 'aniu'e tirahi'ina 'ee ea 'aniu'e tirahura. ¹⁰ 'Ene parua ka'ene 'uasa veji'ina 'ee parupo parua hurichavij'ina 'ee napapo napara hurichavij'ina 'ee monihuna'e ea nesi 'eki'ina 'ee ira'asina 'ee ira'atijino ea hemahē 'waravij'ina 'ee uneunecha 'unama aririjaho panajahu jihipuna'e Tamanakaho vejara. ¹¹ 'Ene Godi ka'ene merajúhi'inijara vu'a mavarasa'ina ikaho nara naja'urono mihana.

Godira Manumirumaji Teimani 'Wa'avara

¹² Na Jesu Keriso ka'ene núni Natohwiji teimani 'wavujaho Hu na harura mihana. Ijihuni maijaho Hu na uchaha pa'ana'e kimarena Huni kaukara'e ve'urono iji pijihana. ¹³ Na nimarako ijaho 'unamakaho matihe 'ee ea sisei 'ahie 'ee ea sise'i ruarahuta. 'Enakaivo Hu ijihuni vaji na numirimana. Ijihuni maijaho na panima rojujhuna'e na pahene pakavij'i avajuta. ¹⁴ 'Enakaivo núni Natohwiji jihuni maiji vvhiani'inijaho 'ee nimaa roijaho 'ee oja 'ekarahunijaho Jesu Keriso oni vaji ni'ima'ura rena paranana. ¹⁵ Ikaho vu'a nimaa ka'ene nú ea maho'o apehunijina. Jesu Kerisora iki mwe'i roajaho ea sisea veji'ina'e ni'aji'i roana. 'Ena'omo ijihipuni vajijaho sisea ka'ene sisee maijaho nana. ¹⁶ Ikehuni hahi na numirivakame nuni vaji ea 'aho'a ka'ene nihoo sisee maijija Jesu Keriso oni masuani ajuarane 'ajija hinujaho ea ka'ene Hu nimaa rone majama hihuna'e apehunijihij naja'i 'ahaume avanana.

17 Hu iviamaa Kinia ka'ene majama hiji'inijina 'ee pakwavi'inijina 'ee haha pakavi'inijina 'ee Hu Godi nikwinuna 'ee Huni hora venahura 'ee pinanijaho aneja púsa pa'ana'e Huna. Ameni.
18 Ike vu'akaho nuni hariha Timoti na a 'waravu. Nitama poropetiepo a rone 'warava ja'ina'e puni vaji mamaaa ijihuna'e 'arasara'amana. **19** 'Ene oni nimaaroijaho vwiha hamि vwihami 'ajo'amana. Ijihuna'e ea 'aho'a puni nimairoa pata'aroha jihuna'e pu sisima epuna'i tira'usahara. **20** 'Ene puni vaja kajino na Haimaneasi'o Arekisanita'o Setani vajahuta. 'Ejakame ijara najahe pu Godi matahujaho arehuna.

2

Sosi Vaji Godi Oja Mahunijina

1 'Ene amurijaho na ja ea maho'o puna'e jarirame 'waravukúne ja pura raka ka'ene pivusahu jihipuna'e siporua 'onahe 'ee puni siporua 'aho'a 'onahe 'ee puni ahija 'ee varapi jihipuna'e 'one 'ee teimani 'wavuri siporuiji 'o'avara. **2** 'Ene Kini epuna 'one 'ee ea mama'ina ka'ene 'ajoha'ina puni siporua 'ojakame nú mamaaa'e matausahe hine 'ee arimaa akuavi'ina'e hihuna. **3** Ikija Godi ka'ene nú Ni'ajúhi'ini jihuni una'ijaho mamaaa 'ee Hu ura rena paranujina. **4** Hu ura renujaho ea maho'o roe nimaiji hena kame 'ee maranihuna'e ura renu. **5** Ijihuna'e Godi nikwinuna 'ee ea vahanuvi'ina nikwinuna. 'Ene Godine 'ee emaa rira mu'oi vahanuvi'ijaho Jesu Kerisona. **6** Ijihuna'e vea nimaa nimaa ka'ene 'waramajara ro apejume Hu Huni hahijino miharena ja maho'o 'imena'e 'ekana. **7** 'Ene ikehuni hahi na vu'a

najahi'ina 'ee apasorua'e iji pijihana. Ijihuna'e na nimaa 'waravu kaivo na ira'ata paapeju. 'Enajihuna'e na Jenitaruepo nimaiiji nimaa rohuna'e najahi'ina. ⁸ 'Enajihuna'e na ura reniujaho parua ka'ene kwaa arakino hijujija 'urine akuavi'i ija ahasirime siporua ka'ene 'o'avajaho paajiname 'ee paninakaravi'i 'o'avara. ⁹ 'Ene 'unama nikwinu'ina kajino na ura napara 'u'o ateha mamai same 'ee puni haha hamia mairiarame ohuna kaivo húmata pamuchame 'ee korutia 'ee perua unecha 'ee ateha ka'ene aneja mama'ini 'imejujaho pasa'avara. ¹⁰ 'Ene napara pu Godi ura renuja'ina'e veji'ina 'wavujihuna'e pu kara mamaijiru vehuna. ¹¹ 'Ene napara masuani vu'ataa hene vu'a ka'ene 'waravu jihipuni hararu hi'avara. ¹² 'Ene na napara ruha paaremahu'e 'urine parua asitahe iki kami vu'a najahura. 'Enakaivo masuani ajuarasahe hijura. ¹³ Ijihuni maijaho Godi maraku'a Atamu venarena iji'a Iviho venana. ¹⁴ 'Ene Atamu pisimihuna pana kaivo napariji nimaa'e pisimiume sisea venana. ¹⁵ 'Enakaivo naparijija pu nimaa rone oja 'ekarame 'ee akume 'ee arimaa'e hi'avajaho vea ka'ene hariha nahejuri veijaho mamaa'e renahuna.

3

Sosi 'Ajoha'ina

¹ Ikaho vu'a ka'ene nimaijinakúne ei pini sosi vaji ruha ka'ene ea 'ajohauji ura re'amajaho kaukara mamaa ura venu. ² Ijí ea ka'ene

'ajoha'ina kajaho ea hu panamahi'ine 'ee na-para nikwinune 'ee ori'ini 'ajo'aravi'ine 'ee hami hiji'ine 'ee huni hora veji'ine 'ee ea suja mapoka aherame huni sei roi'ine 'ee areri ea najahujara re'amana. ³ Hu ea ka'ene toa sisea oja pamih'i'ine 'ee pa'ara'iro ohura apeji'ina kaivo vivinui matauma hihuna ura rej'i'ine 'ee monia oja mihuri 'unamijaho aremajara re'amana. ⁴ Hu ea ka'ene huni kachi'ina hami 'ajohai'ine 'ee hora 'unama aririjino veju'e sesahwaha huni hora vene 'ee huni ira hene veji'inijara re'amana. ⁵ 'Enakaivo ea ka'ene huni kachi'ina hami pa'ajohi'inijara re'amajaho hu 'unama ichá'inijino Godoni sosia 'ajo'ena? ⁶ Hu ea ka'ene mai'o Godoni ea renajaho pare'amana. Ijihuni maijaho ruha ka'ene ma'ava kajihuna'e kehi kehi onareje 'avena siseijara eha sisea ka'ene apena ja'ina'e ape'enakúne. ⁷ Hu ea ka'ene sosia paaru'ika'i samai hijujihi puni una'ijaho huni kara mamaa'e re'ama jihuna'e ea huni vu'a pa'wavakame hu 'avena sisei jihuni kwavaha paaruhuna.

Sosi Kaukara Ni'ajiji'ina

⁸ Ijí 'unama nikwinu'ina kajino tikoni 'u'o ea puni hora vene 'ee mitara patukaravi'ine 'ee toa sisea oja pamih'i'ine 'ee 'unama siseijino monia 'eki'inijija parehuna. ⁹ 'Enakaivo pu hema ka'ene nimaiji najahi'ine 'ee vwiha puna arira'e navi'inijipo rehuna. ¹⁰ 'Ene ea ikija marako vena kive areri vehuna'e 'ee panamahi'ina'e ki'avajaho ijl'a 'warave tikoni huni kaukara ijaho ve'avara. ¹¹ 'Ene 'unama nikwinu'ina kajino

napahwaha epuni hora veji'ine 'ee ea 'ahopuni vu'a sisea pakosarame oji'ine 'ee opuipo hamo 'ajo'aravi'ine 'ee uneunecha maho'o ariraru pauchauchahi veji'ina. ¹² 'Ene veje tikoni napara kwinu kwino savi'ine 'ee puni sesamaa 'ee puni kachi'ina hamo 'ajohai'inijipo reja. ¹³ 'Ene tikoni ka'ene hamo kaukara vejujija puni hora vene 'ee Jesu Keriso oni vajijino pura nima rojujaho pajuma pavehuna.

Hema Ni'inijina

¹⁴ Na ike uneunecha kija jona'e veju vo na nima rojujaho mai'o josu pare'eje na roe ja kihuna. ¹⁵ 'Enakaivo vejuro'i na tetama vehuni jihuna'e na ikija veju. 'Ejakame ja ea kwinu kwino ichá'ina'e Godoni kachi'ina vajijino kara ichá'ina'e veji'i hihuni 'unamijaho kame hehuna. Ijí kachi'ina kajija Godi ka'ene majama hiji'ini jihuni sosia 'ee pu tukeja ka'ene nimaiji 'unanamujina. ¹⁶ Ike aposarahuna pana vo ikaho núni nima roijihuni hemaka ni'inijina. Hu roe haha apejume kavara. 'Ejume Godoni 'Avenijara Hu arimaa 'wamajaho 'ona oji'inapo Hu kavara. 'Ene kwaa ara mapokakaho 'waravume hejara. Hu mwe'a ikino nima rojara 'ee Hu apene akúpa 'ahi hanaji'ina vaji va'ana.

4

Najahi'ina Ira Asinijina

¹ 'Enakaivo Godoni 'Avenijara samaumai ijá 'waramana. Vea túchamaa ijaho ea 'aho'a puni nimairoa are'i kaivo va'e 'avena ka'ene pisimisavi'ini jihipuni vu'a ataa apúsame hehune

'ee 'avena sisei jihipuni tamaniji vehuna. ² Pura 'unama ira'ata ka'ene najahujipo veju'e puni vwiha ijaho areri ajania'e veni jae sirirame pijihu'e swirasahu ja'ina'e rejura. ³ 'Ene pu tanu'urihe panapasi nehuna 'warame 'ee 'iruma 'aho'a pahuna'e 'waravura. 'Enakaivo iija Godira venarena ea ka'ene nimaiji hena kame nima rojujipo teamana'eje vajúsarame ine hinohuna'e venana. ⁴ Ijihuni maijaho uneunecha mapoka ka'ene Godira venajija mamaaruna. 'Ena'omo unenu'u 'aho'a pasenuhuna kaivo teimani roji'i 'ekahuna. ⁵ Ijihuni maijaho Godoni Ira 'ee siporuijara venaume marasahara.

Jesu Keriso Oni Pwea Mamaa Ijihina

⁶ A ikihi rone vwehu nuna naja'amajaho a Jesu Keriso oni pwea mamaa'e rehuna. ⁷ 'Ene na'ia mapoka'e nimaaroa 'ee vu'a mamaa ka'ene ara 'ararihae roajihuni 'ahi hina rouni eiji rehuna. ⁸ Hahake 'ajo'arahuna manura piravu jihipuni eha ijaho ma'u'ua kaivo Godira ura renuja'ina'e uneunecha mapoka manura piravujija iviamaa kehuni hia 'ee hia ka'ene nahama 'waruvvara 'ee hia ka'ene túna'i hihunijaho ni'imá'ura'e ni'ajihuna. ⁹ Ikaho vu'a nima ka'ene nú ea maho'o apehunijina. ¹⁰ Ijihuni maijaho nú ikehuni hahi kaukara harura vene haha heju. Ijihuni maijaho nú nima roijaho Godi ka'ene majama hiji'ina ka'ene ea maho'o puni Ni'ajihí'ini jihuni toi namu. 'Enavo Hu nima hu ea ka'ene nima roji'ina kehipuni Ni'ajúhi'ina. ¹¹ Ike vu'a ikija ira kisina'e 'warame naja'amana. ¹² 'Ene veje a ea maiu'ini jihuna'e a túa paveta'avara.

'Enakaivo ara vu'a 'waramuna 'ee onuna 'ee oja mihuna 'ee nimaa ronuna 'ee arira maa ka'ene venujara ea ka'ene nimaa rojil'inijija najahakame pu 'u'o ija'ina ve'avara. ¹³ Oni oja vwiha iji'i ea rira Godoni vu'a tahe hamि ni'ajihe 'ee najahi'i hi'eje na iji'a vuuta. ¹⁴ Godoni 'Aveni jihuni swara ka'ene oni vaji namuna ka'ene erutaepo puni ija oni toi irechavi'i poropeti puni ira ka'ene 'waravajaho paka'eje aremuroama. ¹⁵ Ike uneunecha kija teamana'eje veje oni pwinana'e re'avara. 'Ejakame ara mamaa ka'ene venujaho ea ka'avara. ¹⁶ A oni hia orono hamि 'ajo'amana 'ee hamि kivi'i najahe 'ee 'unama iraka ka'ene nimaijiru ve'amana. Ijihuni maijaho a ija'ina'e ve'amajaho a orono ni'ajarame 'ee ea ka'ene oni vu'a hejuijija ni'ajihe avahuna.

5

Godoni Ehija Ichá'ina 'Ahihunijina

¹ 'Ene ira kisi emaa pa'urara'avara vo omuna'e jarima 'waramu ja'ina'e 'wareame 'ee kivasi-jija vwehuana'e 'waramu ja'ina'e 'wara'amana. ² 'Ene paranahijija ohuana'e 'waramu ja'ina'e 'wareame 'ee 'asúrijija ma'ipuana'e 'waramu ja'ina'e arira'e vwihami 'wara'amana. ³ 'Ene amuna ka'ene paranamai jihipuni hora hamि ve'avara. ⁴ 'Enakaivo ijí paranaha amuna ka-jaho sesahwaha 'ee sahwaha hi'avajaho maki'eje Godi ura renuji najahareje pu kachi'ina opuipo 'ajoha'avara. Ijihuna'e areri emahwapo pu 'ajoha ja'ina'e eha veya. Ijihuni maijaho 'unama ija'inijara Godiho ura renuna. ⁵ 'Ene amuna

paranamaa ka'ene huhusu hiji'inijaho huni ni-maa roijaho Godoni 'ahi raname ea 'ahopuni sипоруа 'онахе 'еe na'ia veiri'a sипоруа 'оhuna.

⁶ 'Enakaivo napara amuna ka'ene huni hahiji maho'o huni ura ijí aremahujaho hu mai'o hinu kaivo hu nimaan nikwamana. ⁷ Ike uneunecha kija 'u'o najahakame 'unama ka'ene pu namahu-nijaho pave'avara. ⁸ 'Enakaivo ea irara huni kachi'ina 'ee huni kachi'ina ka'ene humaiji hamī pa'ahi'amajaho hora raka ka'ene nimaan ronu-jaho hekajahuna. 'Enajihuna'e ea ka'ene pan-imaa rojii'nijipo vejujaho asitahe anii'ina'e re-huna. ⁹ Napara amuna ka'ene huni juara mapoka mapoka (60) ka'ene parua nikwinu vena hina-jihuni iha ni'ajihuni vajijino ape'avara. ¹⁰ Ijí amuna kajihuni kara mamaa'e 'ee huni sesamaa 'ajoahe pira'eme emarejara 'ee ea apiora hamī 'ahiune 'ee ea aririjija umora somahi'ine 'ee ea ka'ene ahija vaji hijuijja ni'ajihii'ine 'ee hu mamaijiru vehuna ura reji'ina. ¹¹ 'Enakaivo napara maiu'ina ka'ene amuni jihipuni iha pave'avara. Ijihuni maijaho puni hahijihuni ura ka'ene parua vehunijara vejakame Kerisoho oja pamahuna. ¹² Pura nimako nahama 'waravaji tuava jihuni maijaho eha sisea apehuna. ¹³ 'Ene ijiru pana kaivo pu ucha'asahe hine sea sea kino va'e vea nisame ea 'ahopuni vu'a sisea kosarame 'ee ea 'ahopuni kaukara vaji arume raka ka'ene pu pa'warahuna sa'inijaho 'waravi'i hiju. ¹⁴ 'Enajihuna'e na ura reniujaho na-paraa amuna ka'ene ea maiu'inijija parua vene 'ee sesamaa nahena'e 'ee huni sea 'ajohakame nakijaho vea pamahe pu areri panamahuna.

15 Ijihuni maijaho ea 'aho'a nita'arohe va'e Setani 'ararihau. **16** 'Enakúne napara ka'ene nimaa roji'inijaho huni kachi'ina vajijino amuna hi'avajaho hura ni'aja'amana. 'Ejakame sosijaho ahija paape'amana vo sosia amuna ka'ene niho'o nimaa nimaa ni'ajihuniji ni'ajihama. **17** 'Ene eruta ka'ene puni kaukara hami 'ajohe 'ee harura vene ira 'warame 'ee najahu jihipuni hura huarahara vena'avara. **18** Ijihuni maijaho Godoni irijaho ika'ina'e 'warumana. Ja paki'eje purumakaua kuatana arinamiava kaivo maka'eje 'iruma ijii'i ajima tautae 'o'amana 'ee ea ka'ene kaukara veji'inijija puni eha hami apehuna. **19** Ja paki'eje eruta namahe henareje nimaa'e ve'ava. 'Enakaivo ea no'ohe'ina ho no'opisu nimaa vene 'warave he'avajino he'avara. **20** 'Ene ea ka'ene hine hura hara sisea veji'i hijujija ea maho'o puni unaa kajino ira kisi 'urara'avara. 'Eje ea 'aho'ijija ijí kimareje tea junave sisea pave'avara. **21** Na Godiho 'ee Jesu Kerisoho 'ee Huni 'ona ojil'ina ka'ene iji pijiha jihipuni una'i pa'uama 'ivi'i 'waravukúne ike 'unama nimaa kija hami 'ajohe ve'avara. 'Enakaivo ja paki'eje ira ka'ene ja najahume hejaja'ina'e vwhaji'i ve'ava. 'Ene oja ka'ene ronukwino rejujaho pasa'avara. **22** A paka'eje mamako ea 'aho'a iji pijihe nama'ama 'ee ea 'ahopuni sisei jihuni pwinana'a re'ama. 'Ene sisea ija irechami'amana. **23** A tomaaru mapoka pai'amana kaivo oni tea vaji atama ka'ene namuna 'ee atama na'ia mapoka'e 'unaramu jihuna'e 'wainia ma'uaku'uku i'amana. **24** Ja

nivvihaju ea 'aho'a hine sisea veji'i hiju'e ea mapoka hena kime pu eha ape'eja 'wa'eju'e hijura. 'Eju'e ea 'aho'a pura sisea ka'ene vejujaho paki'eju'e navu vo iji'a túna'i samaahiravu'e kivura. ²⁵ Ijí 'unama nikwinu'ina kajino ea 'aho'a mamaa ka'ene vejujija kima hejura kaivo vu ea 'ahopo mamaa ka'ene vejujija pahene paki'eju'e navura'omo túna'i roe samaa reje kihuna.

6

¹ Veje pwea ka'ene puni mama'ini jihipuni harura hari hijujija puni hora vena'avara. 'Ejakame núni Godijihuni iha 'ee núra vu'a ka'ene najahujaho areri paninamue 'waru'avara. ² Ea irahipo puni mama'inijija nimaa roji'ina'e re'avajaho puni hora vena'avara. Pu núni vwehiji jihuna'e puni kaukara hamihami veje pu ijara ni'aji'amana. Ijihuni maijaho pu nimaa roji'ine 'ee oja mihi'ina. 'Enakúne vu'a kija 'warame naja'amana.

Najahi'ina Ira Asina 'Ee Kukua Rukina Nimaa Nimaa Rehunijina

³ Ea irara Jesu Keriso ka'ene núni Natohwi jihuni vu'a ka'ene núra 'waravu ja'ina'e pana kaivo anil'ina najahe 'ee Godoni ura ija'ina'e panajaha ka'avajaho hu huhusu vwhane kehi kehi onujihuna'e pahena pakavi'ina. ⁴ 'Enakaivo huni ura ijija nihol'o sisearune 'ee ninakaraarune 'ee aposaraarune 'ee ira ikihi 'eke ninakarame aposaramuna. 'Ene ijipo vejue ajiname 'ee 'uraarame 'ee ira sisea 'wame 'ee ea 'ahopuna'i vwhiha sisea vwhajura. ⁵ 'Ene hora hara ea

ka'ene vwiha sisesa ijahi pu'úmo vu'a nimaijaho are'i kaivo vwhajujaho Godi ura renujihi ve'avajaho unenu 'aho'a 'ekahuna'e vwhajura. ⁶ Godi ura renuja'ina'e hijujara nú eha mamaa mûhe nú ijara areri retúhuna. ⁷ Ijihuni maijaho nú unenu pina pa'a maisu roara'omo nú unenu pina pa'a vahuna. ⁸ 'Ena'omo nú 'iruma 'ee ateha rukina'e re'avajaho nijipo nú teamanu'eje nú hihuna. ⁹ 'Ene ea ka'ene kukua rukina rehuna ura renaujija ijipo venau'e sisea ani anil'ina vaji arihe 'ee itunavujara venau'e majikari haha hianame 'ee junahuni 'unama ka'ene pua'e pivahinamie pa'arehuna rejura. ¹⁰ Ijihuni maijaho monia oja miujaho sisea ani anil'ina puni chinuma. 'Ene ea 'aho'a monia ura renaujhuna'e puni nimairoa are'i kaivo va'e haha hianame temuka piunivura.

Ori'ini Ichá'ina'e Hine Vehuniji 'Waramajina

¹¹ 'Enakaivo a Godoni eijihuna'e 'unama ija'inijija juha'amana. 'E'ikaivo arira maiji 'ararihae vene 'ee Godi ura renuji vene 'ee nimaarone 'ee oja 'ekarame masuani ajuarame mamaa'e ve'amana. ¹² Nimairoa vajijino 'arasaraa ka'ene nimaiji 'ara'amana. 'Ene majama hihuna ka'ene a ijihuni vaji 'umenaara 'ee ara ei riri epuni una'i ira mamaa ka'ene 'waramajaho ija kisi 'una'amana. ¹³ 'Ene na Godi ka'ene uneunecha maho'o veju'e mai'o hijura 'ee Jesu Keriso ka'ene Ponachasi Pairati oni una'i ira mamaa ka'ene rone nahama 'waramajihuni una'i 'waravu. ¹⁴ 'Enakúne ike vu'a ikija sisea titana rukina rone ea panamahe 'wara'eje a ija kisi 'unama va'e núni Natohwa Jesu

Kerisora ro'amajino 'e'u'amana. ¹⁵ Godiho Huni vea 'ahi Jesu ka'ene merajihii'ina 'ee Huhusu 'ajohai'ina ka'ene kini epuni Kinia 'ee natohwe puni Natohwijaho ranave rohuna. ¹⁶ Majama hihunijaho Hununa'i namu 'ee Hu hanaji'ina vaji hiju'e ea areri Huni una'a pava'ura. 'Ene ea Hu pakavi'ina 'ee Hua'e kahuna areri pana. 'Ene harura 'ee hora vejujaho maho'o majamano Huna. ¹⁷ Ea ka'ene monia 'ee kukua rukina ronare'e iviasi iki mwe'i hijujija 'warave pakehi kehi o'avara. 'Ene puni nimaaroijaho pairechave ijí puni monia ho kukua kajiji puni toi na'avara. 'Enakaivo Godoni toi irechave na'avara. Ijihuni maijaho Hura uneunecha maho'o núra 'eke temarasahuna vajúhuna. ¹⁸ 'Ene 'warave mamaa vene 'ee mamaa'e vejujara pununa'a rarena parani'amana. 'Ene ea swara rukina rene 'ee ea vajihuna amariarama para'avara. ¹⁹ Ja ija'ina'e ve'avajino pu uneunecha mamaa túnhuna opo amairiarame avahuna. 'Ene ijaho hia mamaa ka'ene pura apehunijina. ²⁰ Oo Timoti iraka ka'ene a vajahajaho hami 'ajo'amana. 'Enakaivo mwe'a ikihipuni ira'atijaho juha'amana. 'Ene henaka 'wa'i kaivo ira'atijino 'uraujija pataarora'amana. ²¹ 'Ejume ijihi ea 'aho'a nimaam vejujija puni nimaaroijaho are'i kaivo ani ruva'ara. Maiji vwihaniujaho ahu'umuna.

Godoni Vu'a Maiu'ina

**The New Testament in the Ese Language, also known
as the Managalasi Language, of Papua New Guinea
Nupela Testamen long tokples Mangalasi long Niugini**
copyright © 1975, 1999 Wycliffe Bible Translators, Inc.

Language: Managalasi (Ese or Managalasi)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 11 Nov 2022 from source files
dated 9 Oct 2020

729c2a8f-9ea3-55ca-9318-793c2828d776